

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-978/07  
Sarajevo, 08.11.2007. godine

## Z A P I S N I K

### 8. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 08. novembra 2007. godine

Sjednica je počela u 10.35.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, predsjednicu Federacije Bosne i Hercegovine Borjanu Krišto, premijera Nedžada Brankovića, zamjenike premijera Vjekoslava Bevandu i Gavrila Grahovca, ministre u Vladi Federacije Bosne i Hercegovine, predstavnike nevladinih organizacija, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak su opravdali Muharem Serbezovski, Svetozar Pudarić, Denis Zvizdić i Snježana Milavić.

Na osnovu evidencije Stručne službe, predsjedavajući je konstatovao da sjednici prisustvuje 46 delegata, što čini većinu, te Dom naroda može raditi i punovažno odlučivati.

Prije prelaska na rad delegati su bez primjedbi, sa 46 glasova za i uz jedan uzdržani glas, usvojili Zapisnik 7. sjednice Doma naroda Parlamenta Federacije Bosne i Hercegovine, održane 18. oktobra 2007. godine.

Nakon toga predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

#### **Delegatska pitanja i inicijative**

**Saša Magazinović** je izrazio nezadovoljstvo nedobijanjem potpunog odgovora u vezi sa podacima o savjetnicima nosilaca funkcija izvršne i zakonodavne vlasti u Federaciji Bosne i Hercegovine, te je zamolio sekretara Doma naroda Izmira Hadživdića da mu se do naredne sjednice ponovo dostave traženi podaci.

Pokrenuo je inicijativu da Dom naroda pozove lidere političkih stranaka da pokažu odgovornost i u što kraćem roku ponude zajedničko

rješenje za izlazak iz trenutne političke krize u Bosni i Hercegovini. Također, zatražio je od predsjedavajućeg da se Dom naroda izjasni o ovoj inicijativi.

U vezi sa ovim razvila se diskusija u kojoj su učestvovali: Muhamed Osmić, Asim Mekić i Asim Kamber.

Predsjedavajući Stjepan Krešić je predložio da se o ovoj inicijativi izjasni Kolegij Doma naroda na sljedećoj sjednici, što je predlagač i prihvatio.

**Besim Spahić** je pokrenuo inicijativu da se pristupi izradi Plana zaštite okoliša i u okviru toga Program zaštite od buke.

**Asim Kamber** je uputio pitanje predsjednici Federacije i premijeru Federacije u vezi sa mjerama koje Vlada Federacije poduzima u cilju osiguranja neophodnih sredstava potrebnih za funkcioniranje Federacije u slučajevima elementarnih nepogoda i drugim okolnostima koje bi mogle ugroziti normalne životne tokove.

**Mira Ljubijankić** je, u ime Kluba delegata srpskog naroda, uputila pitanje Federalnom ministarstvu za rad i socijalnu politiku u vezi sa nacionalnom strukturom zaposlenih u organima uprave, općinama, kantonima, javnim ustanovama i javnim preduzećima u Federaciji u odnosu na nacionalnu strukturu zaposlenih prema popisu stanovništva iz 1991. godine.

**Lidija Bradara** je uputila pitanje Federalnom ministarstvu unutrašnjih poslova - u kojoj fazi je istraga u vezi sa ubistvom Joze Leutara, bivšeg zamjenika federalnog ministra unutrašnjih poslova i osam travničkih povratnika i policajaca hrvatske nacionalnosti. S tim u vezi upitala je da li je istraga prešla u nadležnost tužiteljstva i ako jeste da joj se dostavi informacija o tome.

**Kenan Keserović** postavio je dva delegatska pitanja premijeru Federacije i Federalnom ministarstvu kulture i sporta.

Prvo se odnosi na donošenje Zakona o mladima a drugo na donošenje Strategije razvoja omladinske politike u Federaciji.

**Drago Puzigaća** je uputio pitanje ombudsmenu Federacije – koje su se mjere poduzele vezano za dopis općinskog načelnika, odnosno predsjednika Općinskog vijeća Drvar a vezano za probleme u osnovnoj školi u Drvaru.

**Elvira Abdić-Jelenović** je postavila dva delegatska pitanja.

Prvo pitanje uputila je Predsjedništvu Bosne i Hercegovine i nadležnim institucijama Bosne i Hercegovine a odnosi se na broj pravnih i fizičkih lica koja su do septembra 2007. godine ostvarila uvid u transkripte sjednica Predsjedništva i Skupštine Bosne i Hercegovine u periodu od 1992. do 1994. godine i ko je potpisnik odobrenja u uvid tih transkripta.

Drugo pitanje je uputila premijeru Federacije u vezi sa zdravstvenom zaštitom 868 radnika „Agrokomerca“ i koje je mjere Vlada Federacije poduzela na izmirenju obaveza prema zdravstvenom osiguranju.

**Mislav Sučić** je postavio pitanje Federalnom ministarstvu poljoprivrede, vodoprivrede i šumarstva u vezi sa novčanim naknadama za obrađivače zemljišta u jesenjoj sjetvi u Federaciji. Zatražio je od Federalnog

ministarstva poljoprivrede, vodoprivrede i šumarstva da ukine mjeru koja onemogućava košenje zelene mase. Također, zatražio je projekciju u vezi sa obradom polja, koja se odnosi na izjavu premijera u vezi sa pravljenjem radilišta u Federaciji i izdvajanja 400 KM po hektaru obradive površine.

**Sead Čaušević** postavio je pitanje Federalnom ministarstvu pravde - da li je pokrenut postupak, u kojoj je fazi i kada se mogu očekivati izmjene i dopune Zakona o stečaju.

**Igor Rajner** uputio je pitanje Vladi Federacije, federalnom ministru finansija i federalnom ministru pravde a tiče se načina, kriterija i uvjeta oko imenovanja savjetnika, kao i ukupnog broja savjetnika koji se mogu imenovati.

**Josip Perić** uputio je pitanje Vladi Federacije u vezi sa postojanjem fiktivnih preduzeća i njihovim uticajem na budžet Federacije, te da li Vlada ima informaciju da li se novim zakonskim rješenjima i akcijama broj takvih preduzeća umanjio.

\* \* \*

Nakon postavljenih delegatskih pitanja i pokrenutih inicijativa prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila tri prijedloga zakona sa prijedlogom da se razmatraju po hitnom postupku.

Premijer Federacije je na prijedlog Kluba delegata bošnjačkog naroda povukao 3. tačku iz predloženog dnevnog reda - Prijedlog Zakona o izmjenama i dopunama Zakona o prodaji stanova na kojima postoji stanarsko pravo. Također, predložio je da se u okiru 12. tačke - Izbor i imenovanja - ne raspravlja o imenovanju federalnog pravobranioca do naredne sjednice.

Vlada Federacije dostavila je Prijedlog Zakona o vraćanju, dodjeli i prodaji stanova i Prijedlog Zakona o poljoprivredi sa prijedlogom da se razmatraju po hitnom postupku.

Predsjedavajući je pozvao delegate da se o ovome izjasne i konstatovao sljedeće:

- Dom naroda Parlamenta Federacije Bosne i Hercegovine je, sa 34 glasa za i uz četiri uzdržana glasa, prihvatio da se Prijedlog Zakona o vraćanju, dodjeli i prodaji stanova razmatra po hitnom postupku;
- Dom naroda Parlamenta Federacije Bosne i Hercegovine jednoglasno je prihvatio da se Prijedlog Zakona o poljoprivredi razmatra po hitnom postupku.

Predsjedavajući je podsjetio delegate da je dostavljen i Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica (predlagač: Asim Mekić, delegat u Domu naroda) sa prijedlogom da se razmatra po skraćenom postupku. Također, upoznao je delegate da je na Kolegiju dogovoreno da se ovaj

Zakon ne razmatra na ovoj sjednici dok se ne pribavi mišljenje Vlade Federacije.

U daljnjoj raspravi o prijedlogu dnevnog reda učestvovali su: Lidija Bradara, Josip Perić, Nedžad Branković, Mira Ljubijankić, Jasenko Tufekčić, Saša Magazinović, Ivo Komšić, Asim Mekić i Igor Rajner.

U vezi sa povlačenjem Prijedloga Zakona o izmjenama i dopunama Zakona o prodaji stanova na kojima postoji stanarsko pravo sa dnevnog reda predsjednik Kluba delegata hrvatskog naroda Josip Perić i predsjednica Kluba delegata srpskog naroda Mira Ljubijankić zatražili su pauzu kako bi zauzeli stavove o ovom pitanju.

Nakon pauze, Mira Ljubijankić je izjavila da Klub delegata srpskog naroda prihvata premijerov prijedlog da se odgodi rasprava o ovom Zakonu do sljedeće sjednice na kojoj bi to bila 1. tačka dnevnog reda.

U ime Kluba delegata hrvatskog naroda Josip Perić je izjavio da se Kluba slaže sa prijedlogom Mire Ljubijankić.

Potom je predsjedavajući dao na glasanje dnevni red u cjelini.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 43 glasa za i uz jedan glas protiv, usvojio sljedeći:

## **D N E V N I R E D**

1. Informacija o stanju energetskog sektora Federacije Bosne i Hercegovine sa Izveštajem o realizaciji Akcionog plana za prestruktuiranje elektroenergetskog sektora Bosne i Hercegovine/Federacije Bosne i Hercegovine kao dopuna Informacije;
2. Prijedlog Zakona o izmjenama i dopunama Zakona o vraćanju, dodjeli i prodaji stanova - hitni postupak;
3. Prijedlog Zakona o poljoprivredi - hitni postupak;
4. Prijedlog Zakona o izmjeni Zakona o rudarstvu (predlagač: Nermina Kapetanović, zastupnica u Predstavničkom domu) - skraćeni postupak;
5. Nacrt Zakona o izboru, prestanku mandata, opozivu i zamjeni načelnika općina u Federaciji Bosne i Hercegovine (predlagač: Jozo Ivančević, zastupnik u Predstavničkom domu);
6. Autentično tumačenje člana 52. Zakona o udruženjima i fondacijama;
7. Odluka o izmjenama i dopunama Odluke o pristupanju izradi Prostornog plana Federacije Bosne i Hercegovine za period od 2000. do 2022. godine;
8. Prijedlog Programa razvoja zaštite i spasavanja ljudi i materijalnih dobara od prirodnih i drugih nesreća u Federaciji Bosne i Hercegovine za period od 2007. do 2011. godine;
9. Statut Agencije za kvalitet i akreditaciju u zdravstvu u Federaciji Bosne i Hercegovine;
10. Izbor i imenovanja.

## **1. Informacija o stanju energetskog sektora Federacije Bosne i Hercegovine sa Izvještajem o realizaciji Akcionog plana za prestrukturiranje elektroenergetskog sektora Bosne i Hercegovine/ Federacije Bosne i Hercegovine kao dopuna Informacije**

Vlada Federacije je razmatrala i primila na znanje Informaciju o stanju energetskog sektora Federacije Bosne i Hercegovine i dostavila je Parlamentu Federacije na razmatranje i prihvatanje, a naknadno je dostavila i Izvještaj o realizaciji Akcionog plana za prestrukturiranje elektroenergetskog sektora Bosne i Hercegovine/Federacije Bosne i Hercegovine kao dopunu Informacije.

Predstavnički dom je na nastavku 3. sjednice, održane 25.07.2007. godine, usvojio Izvještaj i zaključke.

Informaciju su razmatrala nadležna radna tijela i dostavila svoje izvještaje.

Informaciju je obrazložio federalni ministar energije, rudarstva i industrije Vahid Hećo.

U raspravi su učestvovali: Alija Begović, Ramo Isak, Saša Magazinović, Besim Imamović, Ivo Komšić i Vahid Hećo.

Nakon toga je predsjedavajući Besim Imamović, koji je u međuvremenu preuzeo rukovođenje sjednicom, dao Informaciju na glasanje.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 37 glasova za i uz dva uzdržana glasa, usvojio sljedeći:

### **ZAKLJUČAK**

Dom naroda Parlamenta Federacije Bosne i Hercegovine prima na znanje Informaciju o stanju energetskog sektora u Federaciji Bosne i Hercegovine sa Izvještajem o realizaciji Akcionog plana za prestrukturiranje elektroenergetskog sektora Bosne i Hercegovine /Federacije Bosne i Hercegovine.

## **2. Prijedlog Zakona o izmjenama i dopunama Zakona o vraćanju, dodjeli i prodaji stanova**

Prijedlog Zakona utvrdila je Vlada Federacije Bosne i Hercegovine.

Predstavnički dom je na 6. sjednici, održanoj 30.10.2007. godine, usvojio Prijedlog Zakona sa jednim amandmanom koji je Vlada Federacije prihvatila pa je postao sastavni dio Prijedloga Zakona.

Zakon su razmatrala nadležna radna tijela i dostavila svoje izvještaje.

Odbor za prostorno uređenje, ekologiju i stambeno-komunalne poslove podnio je amandman, koji se odnosi na dodavanje stava 2. u članu 2. Prijedloga Zakona i predložio Zaključak.

U pretresu su učestvovali: Muhamed Osmić, Nikola Simić, Mirsad Pindžo, Igor Rajner i Jasenko Tufekčić.

U pretresu je učestvovao i Ivo Komšić koji je predložio slijedeći

### ZAKLJUČAK

Zadužuje se Federalno ministarstvo pravde, Federalna uprava za geodetske i imovinsko-pravne poslove i Federalno pravobranilaštvo da, u roku od 30 dana, iznađu način i postupak za rješavanja pitanja uknjižbe u državno vlasništvo stanova čiji su vlasnici umrli a nemaju nasljednika.

U pretresu je učestvovala i Lidija Bradara koja je također predložila

### ZAKLJUČAK

Traži se od Federalnog ministarstva prostornog uređenja da sačini popis osoba koje su bile nosioci stanarskih prava a koje se vode kao nestale.

Nakon pretresa Fatima Hadžibegić, pomoćnica federalnog ministra prostornog uređenja, je izjavila da, ispred Vlade Federacije, prihvata amandman Odbora za prostorno uređenje, ekologiju i stambeno-komunalne poslove.

#### **Amandman**

U članu 2. dodaje se novi stav 2. koji glasi:

"Zahtjev za dodjelu zamjenskog stana nosioci stanarskog prava na stanovima u privatnom vlasništvu podnose općinskoj službi nadležnoj za stambene poslove u općini na čijoj se teritoriji nalazi stan u privatnom vlasništvu. Općina je dužna dodijeliti zamjenski stan koji mora biti u istoj općini i iste kvadrature plus, minus 10% u roku od šest mjeseci od dana prijema zahtjeva za dodjelu zamjenskog stana."

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 42 glasa za i uz dva uzdržana glasa, usvojio Prijedlog Zakona o izmjenama i dopunama Zakona o vraćanju, dodjeli i prodaji stanova.

Tom prilikom Dom naroda je usvojio i sljedeći:

### ZAKLJUČAK

Zadužuje se Vlada Federacije Bosne i Hercegovine da Domu naroda Parlamenta Federacije Bosne i Hercegovine dostavi informaciju o tačnom broju stanova po pojedinim općinama a koje razmatra ovaj Zakon.

Kako je Prijedlog Zakona usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

### 3. Prijedlog Zakona o poljoprivredi

Prijedlog Zakona je utvrdila Vlada Federacije.

Predstavnički dom je na 6. sjednici, održanoj 30.10.2007. godine, usvojio Prijedlog Zakona sa 18 amandmana koje je Vlada Federacije prihvatila pa su postali sastavni dio Prijedloga Zakona. Tom prilikom usvojen je i Zaključak.

Zakon su razmatrala nadležna radna tijela i dostavila svoje izvještaje.

Predsjednik Odbora za poljoprivredu, vodoprivredu i šumarstvo Zoran Budimić je ispred Odbora predložio Zaključak.

U pretresu su učestvovali: Jasenko Tufekčić, Igor Rajner i Damir Ljubić, federalni ministar poljoprivrede, vodoprivrede i šumarstva, koji je izjavio da prihvata Zaključak Odbora za poljoprivredu, vodoprivredu i šumarstvo.

Dom naroda usvojio je sljedeći:

#### ZAKLJUČAK

Zadužuje se Vlada Federacije Bosne i Hercegovine, odnosno Federalno ministarstvo poljoprivrede, vodoprivrede i šumarstva da inicira aktivnosti na izmjenama i dopunama Zakona o penzijskom i invalidskom osiguranju, Zakona o zdravstvenom osiguranju, Zakona o doprinosima i svih drugih propisa u Federaciji Bosne i Hercegovine kojima se reguliraju prava iz navedenih oblasti u smislu povoljnijeg položaja poljoprivrednika – poljoprivrednih proizvođača. To se naročito odnosi na povoljnije uvjete penzionisanja poljoprivrednika kroz smanjenje osnovica za navedene vidove osiguranja, kao i za povoljnije (manje) stope doprinosa.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 38 glasova, usvojio Prijedlog Zakona o poljoprivredi.

### 4. Prijedlog Zakona o izmjeni Zakona o rudarstvu (predlagač: Nermina Kapetanović, zastupnik u Predstavničkom domu)

Predstavnički dom je na nastavku 25. sjednice, održane 28.06.2006. godine, usvojio Prijedlog Zakona uz sljedeću tehničku korekciju koju je predlagač prihvatio:

U članu 1. u stavu 2. riječi: "knjigu katastra" zamjenjuju se riječima: "zemljišne knjige".

Zakon su razmatrala nadležna radna tijela i dostavila svoje izvještaje.

U pretresu je učestvovao Igor Rajner koji je zajedno sa Tomom Vidovićem i Seadom Čauševićem podnio amandman koji je predlagač Zakona prihvatio.

### **Amandman**

U članu 1. stav 1. mijenja se i glasi:

“Za novogradnju u granicama eksploatacionog polja, prije izdavanja urbanističke saglasnosti, potrebno je prethodno pribaviti mišljenje rudarskog preduzeća i saglasnost ministarstva nadležnog za rudarstvo.”

U stavu 2. riječi u prvom redu: “Saglasnost iz stava 1. ovog člana može” zamjenjuju se riječima: “Saglasnosti iz stava 1. ovog člana mogu”.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 38 glasova, usvojio Prijedlog Zakona o izmjeni Zakona o rudarstvu.

Budući da je Prijedlog Zakona usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

### **5. Nacrt Zakona o izboru, prestanku mandata, opozivu i zamjeni načelnika općina u Federaciji Bosne i Hercegovine (predlagač: Jozo Ivančević, zastupnik u Predstavničkom domu)**

U vezi sa Nacrtom Zakona Vlada Federacije je dostavila mišljenje i smatra da on nije u skladu sa sistemom isključive podjele vlasti koja je zasnovana donošenjem Zakona o direktnom izboru općinskog načelnika u Federaciji Bosne i Hercegovine.

Predstavnički dom je na 6. sjednici, održanoj 30.10.2007. godine, razmatrao Nacrt Zakona i usvojio Zaključak kojim zadužuje Vladu Federacije, odnosno nadležno ministarstvo da u roku od 60 dana predloži izmjene i dopune Zakona ili novi zakon.

S obzirom na to da predlagač Nacrta Zakona nije bio prisutan, predsjedavajući je predložio da se ova tačka skine sa dnevnog reda, što su delegati i prihvatili (35 glasova za).

### **6. Autentično tumačenje člana 52. Zakona o udruženjima i fondacijama**

Predstavnički dom je na nastavku 5. sjednice, održane 30.10.2007. godine, donio autentično tumačenje člana 52. Zakona o udruženjima i fondacijama (“Službene novine Federacije BiH”, br. 45/02).

Zakonodavno-pravna komisija Doma naroda razmatrala je Prijedlog za autentično tumačenje člana 52. Zakona o udruženjima i fondacijama, koji je podnio Odbor za pravdu i opću upravu Predstavničkog doma, podrazumijevajući i inicirajući prijedlog zastupnika Irfana Ajanovića kao i mišljenje Vlade Federacije. Komisija je utvrdila da je Prijedlog za autentično tumačenje člana 52. Zakona o udruženjima i fondacijama osnovan i



predložila Domu naroda da ga donese u istovjetnom tekstu kako ga je donio i Predstavnički dom.

### **Autentično tumačenje člana 52. Zakona o udruženjima i fondacijama**

1. Rok od šest mjeseci iz člana 52. Zakona o udruženjima i fondacijama («Službene novine Federacije BiH», br. 45/02) nije prekluzivni rok. Protekom tog roka rad udruženja ili fondacije ne prestaje. Federalno ministarstvo pravde može rješavati o zahtjevu za podnošenje općih akata udruženja ili fondacija a objavit će se u «Službenim novinama Federacije BiH».
2. Autentično tumačenje primjenjuje se i važi od dana primjene člana 52. Zakona o udruženjima i fondacijama i objavit će se u «Službenim novinama Federacije BiH».

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova, donio Odluku o osnovanosti za davanje autentičnog tumačenja člana 52. Zakona o udruženjima i fondacijama.

### **7. Odluka o izmjenama i dopunama Odluke o pristupanju izradi prostornog plana Federacije Bosne i Hercegovine za period od 2000. do 2022. godine**

Odluku je donijela Vlada Federacije i dostavila je Parlamentu Federacije Bosne i Hercegovine na razmatranje i donošenje.

Predstavnički dom je na nastavku 3. sjednice, održane 04.07.2007. godine, donio Odluku o izmjenama i dopunama Odluke o pristupanju izradi Prostornog plana Federacije Bosne i Hercegovine za period od 2000. do 2022. godine, uz amandman koji je Vlada Federacije prihvatila.

Odluku su razmatrala nadležna radna tijela i dostavila svoje izvještaje.

U raspravi su učestvovali Igor Rajner i Alija Begović, koji je podnio četiri amandmana.

Ispred Vlade Federacije amandmane Alije Begovića prihvatila je Hanka Mušibegović, pomoćnik federalnog ministra prostornog uređenja.

#### **Amandman I**

U članu 1. Prijedloga Odluke dodaje se novi stav 1. koji glasi:

U naslovu, u članu 1. u stavu 1. i u članu 2. u stavu 2. Odluke o pristupanju izradi Prostornog plana Federacije Bosne i Hercegovine za period od 2002. do 2022. godine («Službene novine Federacije BiH», br. 20/04) broj «2002» zamjenjuje se brojem «2008» a broj «2022» zamjenjuje se brojem «2028».

Dosadašnji stav 1. postaje stav 2.

### **Amandman II**

U naslovu Prijedloga Odluke broj "2000" zamjenjuje se brojem "2008" a broj "2022", zamjenjuje se brojem "2028".

### **Amandman III**

U članu 1. Prijedloga Odluke u prvom redu iza riječi "FBiH" dodaju se riječi: "za period od 2008. do 2028. godine".

### **Amandman IV**

U članu 7. u stavu 1. Prijedloga Odluke riječi: "U članu 8. stav 1." zamjenjuju se riječima: "Član 8.".

Na osnovu rezultata glasanja, predsjedavajući Drago Puzigaća, koji je u međuvremenu preuzeo rukovođenje sjednicom, konstatovao je da je Dom naroda Parlamenta Federacije Bosne i Hercegovine, sa 33 glasa za i uz jedan glas protiv, donio Odluku o izmjenama i dopunama Odluke o pristupanju izradi Prostornog plana Federacije Bosne i Hercegovine za period od 2000. do 2022. godine.

Kako je Prijedlog Odluke usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

## **8. Prijedlog Programa razvoja zaštite i spasavanja ljudi i materijalnih dobara od prirodnih i drugih nesreća u Federaciji Bosne i Hercegovine za period od 2007. do 2011. godine**

Prijedlog Programa utvrdila je Vlada Federacije i dostavila Parlamentu Federacije Bosne i Hercegovine na razmatranje i donošenje.

Predstavnički dom je na nastavku 5. sjednice, održane 02.10.2007. godine, donio Prijedlog Programa razvoja zaštite i spasavanja ljudi i materijalnih dobara od prirodnih i drugih nesreća u Federaciji Bosne i Hercegovine za period od 2007. do 2011. godine, uz primjedbe Komisije za odbranu i sigurnost koje je Vlada Federacije prihvatila.

Primjedbe glase:

- Na strani 21. u dijelu 3. "**Program zaštite od epidemija**" u tački 2. **Postojeće stanje** umjesto riječi: "Postojeći zakon o zdravstvenoj zaštiti je u nekim elementima prevaziđen, a Zakon o zdravstvenom osiguranju još nije ni donesen" treba pisati: "**Postojeći zakoni o zdravstvenoj zaštiti i zdravstvenom osiguranju su u nekim elementima prevaziđeni i treba ih inovirati.**"
- U tački 3. **Područja razvoja** pod a) **Prevenција i ublažavanje** u stavu 1. iza tačke 1. dodaje se nova tačka 2. koja glasi: "**2. Zakon o zdravstvenom osiguranju ("Službene novine Federacije BiH", br. 30/97 i 7/02)**".  
Dosadašnje tač. 2., 3. i 4. postaju tač. 3., 4. i 5.

- Pod dijelom: **Ublažavanje kao vizija novog stanja treba osigurati kroz:** u tački 1) **Administrativno-stručne mjere** druga alineja mijenja se i glasi: **“Donošenje novog zakona o zdravstvenom osiguranju ili izvršiti izmjene i dopune postojećeg”**.

Prijedlog Programa razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 34 glasa, donio Program razvoja zaštite i spasavanja ljudi i materijalnih dobara od prirodnih i drugih nesreća u Federaciji Bosne i Hercegovine za period od 2007. do 2011. godine.

## **9. Statut Agencije za kvalitet i akreditaciju u zdravstvu u Federaciji Bosne i Hercegovine**

Statut Agencije za kvalitet i akreditaciju u zdravstvu u Federaciji Bosne i Hercegovine utvrdio je Upravni odbor Agencije i dostavio Parlamentu Federacije Bosne i Hercegovine na razmatranje i donošenje.

Predstavnički dom je na nastavku 5. sjednice, održane 02.10.2007. godine, donio Odluku o davanju saglasnosti na Statut Agencije za kvalitet i akreditaciju u zdravstvu u Federaciji Bosne i Hercegovine sa dvije izmjene predložene od Vlade Federacije koje se odnose na član 14. stav 2. i član 24. stav 2. da se ispred riječi: “za još jedan mandatni period” doda riječ “najviše”.

Dom naroda je prihvatio i sljedeće tehničke primjedbe koje su date na sjednici Predstavničkog doma a koje je Vlada Federacije prihvatila:

- u članu 12. u stavu 5. precizirati “Direktor **je obavezan** prisustvovati sjednicama Savjetodavnog vijeća” i u članu 16. u stavu 4. “Direktor **je obavezan** prisustvovati sjednicama Upravnog odbora”,
- u članu 16. u stavu 3. “Upravni odbor/Vijeće donosi odluke većinom glasova **ukupnog broja** članova Upravnog odbora/Vijeća”,
- u članu 19. pojasniti da glasi: “U slučaju odsutnosti predsjednika Upravnog odbora/Vijeća zamjenjuje onaj član Upravnog odbora/Vijeća za koga se odluči većina na sjednici”,
- u članu 22. u stavu 2. na kraju rečenice tačku zamijeniti zarezom i dodati riječi: “a uz saglasnost federalnog ministra zdravstva”.

Statut su razmatrala nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 34 glasa, donio Odluku o davanju saglasnosti na Statut Agencije za kvalitet i akreditaciju u zdravstvu u Federaciji Bosne i Hercegovine.

## 10. Izbor i imenovanja

### a) Prijedlog Odluke o izmjeni Odluke o izboru članova u Parlamentarnu komisiju odgovornu za reviziju

Predstavnički dom je na 6. sjednici, održanoj 31.10.2007. godine, donio Odluku o izmjeni Odluke o izboru članova u Parlamentarnu komisiju odgovornu za reviziju.

Prijedlog Odluke o izmjeni Odluke o izboru članova u Parlamentarnu komisiju odgovornu za reviziju utvrdile su komisije za izbor i imenovanja oba doma Parlamenta.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 36 glasova, donio Odluku o izmjeni Odluke o izboru članova u Parlamentarnu komisiju odgovornu za reviziju, kojom je za člana izabran **Mirsad Zaimović** umjesto Amele Mešić.

### b) Prijedlog Odluke o potvrđivanju Odluke o imenovanju člana Komisije za vrijednosne papire Federacije Bosne i Hercegovine

Predsjednica Federacije Bosne i Hercegovine Borjana Krišto je, uz saglasnost potpredsjednika Federacije, donijela Odluku o imenovanju Džafera Alibegovića na dužnost člana Komisije za vrijednosne papire Federacije Bosne i Hercegovine i dostavila Parlamentu Federacije Bosne i Hercegovine na potvrđivanje.

Komisija za izbor i imenovanja Doma naroda je utvrdila Prijedlog Odluke o potvrđivanju Odluke o imenovanju člana Komisije za vrijednosne papire Federacije Bosne i Hercegovine.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova, donio Odluku o potvrđivanju Odluke kojom je **Džafer Alibegović** imenovan na dužnost člana Komisije za vrijednosne papire Federacije Bosne i Hercegovine.

\* \* \*

Sjednica je završena u 16.16.

Transkript sa sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Stjepan Krešić